

Službeni glasnik BiH, broj 17/03

Na osnovu člana 16. Zakona o upravi ("Službeni glasnik BiH", broj 32/02), člana 14. Zakona o ministarstvima i drugim organima uprave Bosne i Hercegovine ("Službeni glasnik BiH", broj 5/03), a u vezi sa članom 12., 14., 21. i 24. Zakona o imigraciji i azilu Bosne i Hercegovine ("Službeni glasnik BiH", broj 23/99), ministar sigurnosti Bosne i Hercegovine donosi

PRAVILNIK

O OBRASCU LIČNE KARTE I PODACIMA SADRŽANIM U LIČNOJ KARTI ZA STRANCA

I - OPĆE ODREDBE

Član 1.

Ovim Pravilnikom propisuje se obrazac lične karte za stranca (u daljem tekstu: LK/OI za stranca) i podaci koje mora sadržavati obrazac LK/OI za stranca, nadležni organi za izdavanje LK/OI za stranca i način vođenja evidencije izdatih LK/OI za stranca i druga pitanja.

Član 2.

LK/OI za stranca ima oblik kartice, formata 8,5 cm x 5,4 cm, debljine 0,81 mm, izrađena višeslojnom tehnologijom od bijelog i transparentnog polikarbonatnog materijala sa primjesama okeržute i sive boje u svijetlim tonovima. Obrazac LK/OI za stranca sadrži rubrike sa prednje strane i poledine obrasca u koje se upisuju propisani podaci.

Član 3.

Naslov i nazivi rubrika na obrascu LK/OI za stranca ispisani su na bosanskom, hrvatskom, srpskom, francuskom i engleskom jeziku. Tekst na bosanskom, hrvatskom i srpskom jeziku ispisan je latiničnim i ćiriličnim pismom. Pojedinačne podatke koji se unose u obrazac LK/OI za stranca nadležni organ ispisuje latiničnim pismom.

II - SADRŽAJ OBRASCA LIČNE KARTE ZA STRANCA

Član 4.

Prednja strana obrasca LK/OI za stranca sadži u gornjem lijevom uglu naslov "Bosna i Hercegovina", a desno pored toga na središnjem dijelu naslov "Lična karta za stranca", a u desnom uglu grb Bosne i Hercegovine. S lijeve strane središnjeg dijela obrasca ispod naslova "Bosna i Hercegovina" nalazi se prostor za fotografiju i potpis imaoa LK/OI za stranca. Pored navedenog na prednjoj strani obrasca LK/OI za stranca ispod naziva "lična karta za stranca" nalazi se rubrika u koju se upisuju podaci o prezimenu i imenu, spolu, državljanstvu, datumu rođenja, mjestu rođenja, roku važenja LK/OI i serijskom broju, a u donjem lijevom uglu nalazi se rubrika potpis imaoa LK/OI za stranca. Na poleđini obrasca LK/OI za stranca u gornjem lijevom uglu upisuje se jednodimenzionalni bar kod 39 sa podacima o jedinstvenom matičnom broju stranca, a u desnom gornjem uglu upisuje se dvodimenzionalni bar kod PDF - 417 sa podacima otiska prstiju i drugim podacima o imaoa LK/OI za stranca. Na lijevoj strani srednjeg dijela poleđine obrasca LK/OI za stranca nalazi se utisnut grb Bosne i Hercegovine a pored njega u vertikalnom položaju u zlatnoj štampi naziv "BiH". U središnjem dijelu poleđine obrasca LK/OI za stranca upisuje se jedinstveni matični broj stranca, datum izdavanja, općina stalnog boravka, naziv nadležnog organa koji je izdao LK/OI za stranca i rubrika "Napomena", a ostali prostor poleđine obrasca predstavlja mašinski čitljivu zonu u koju se u obliku slova, brojeva i znakova upisuju podaci koji se mogu elektronski očitati. Izgled obrasca LK/OI za stranca prikazan je na slici broj 1. i slici broj 2., i sastavni su dio ovog pravilnika.

III - IZDAVANJE, ZAMJENA, PONIŠTAVANJE I EVIDENCIJA LK/OI ZA STRANCA

Član 5.

Izdavanje, zamjenu i poništavanje LK/OI za stranca, vrše u Federaciji Bosne i Hercegovine kantonalna ministarstva unutrašnjih poslova, u Republici Srpskoj centri javne bezbjednosti, stanice javne bezbjednosti, policijske stanice Ministarstva unutrašnjih poslova Republike Srpske, u Brčko Distriktu Bosne i Hercegovine Odjeljenje za javni registar-pododjeljenje za lična dokumenta (u daljem tekstu: nadležni organ), po mjestu stalnog boravka stranca.

Član 6.

Stranac je dužan zamijeniti LK/OI za stranca u slučaju promjene stalnog boravka ili bilo kog podatka sadržanog u obrascu LK/OI, oštećenja izdate LK/OI za stranca, kao i slučaju bitne izmjene lika nastale kao posljedica fizičkog ili hemijskog djejtva, bolesti ili biološkog procesa, u roku od 30 dana od dana kada je navedena promjena nastupila.

Član 7.

Stranac je dužan vratiti LK/OI za stranca nadležnom organu iz člana 2. ovog pravilnika ukoliko mu je ukinuto odobrenje za stalni boravak u Bosni i Hercegovini, a na osnovu čl. 30. i 31. Zakona o imigraciji i azilu Bosne i Hercegovine ("Službeni glasnik BiH", broj 23/99).

Član 8.

Zamijenjena i vraćena LK/OI za stranca se poništava. Poništenje LK/OI za stranca vrši se bušenjem obrasca i isti se komisijski uništavaju. O uništenim LK/OI za stranca sačinjava se zapisnik.

Član 9.

O poništenim i uništenim LK/OI za stranca vodi se evidencija na način propisan u članu 14. ovog pravilnika.

Član 10.

Fotografija na LK/OI za stranca mora vjerno prikazivati lik imaoča LK/OI (sa lica - en face) bez šešira kape ili mahrame. Izuzetno, od odredbe stava 1. ovog člana, stranci koji po običajima zemlje iz koje dolaze (narodna nošnja) nose šešir, kapu ili mahramu mogu se fotografisati sa šeširom kapom ili mahramom s tim što čelo ne smije biti pokriveno.

Član 11.

Bitnom izmjenom izgleda lica zbog koje se LK/OI za stranca mora zamijeniti smatraju se trajne izmjene lica nastale usljed fizičkog ili hemijskog djelovanja bolesti ili prirodnog biološkog procesa, zbog kojih je očigledno onemogućeno ili otežano prepoznavanje na osnovu fotografije u LK/OI za stranca. Bitnom izmjenom izgleda u smislu prethodnog stava smatraju se i razlike u izgledu lica na fotografiji i stvarnog izgleda koji nastanu usljed većih promjena u načinu držanja, dužine i boje kose, brkova ili brade usljed čega je nemoguće ili otežano prepoznavanje sa fotografijom na LK/OI za stranca.

Član 12.

U slučaju gubitka LK/OI za stranca, stranac je dužan gubitak prijaviti najbližoj policijskoj stanici koja će nakon zaprimljene prijave sačiniti izvještaj. Primjerak izvještaja o gubitku LK/OI za stranca uručuje se stranci i istovremeno obavještava nadležni organ koji je izdao LK/OI za stranca.

Član 13.

Obrazac LK/OI za stranca propisan ovim pravilnikom obezbjeđuje Ministarstvo civilnih poslova Bosne i Hercegovine.

Član 14.

Evidencija o LK/OI za stranca vodi se elektronskim putem. Nadležni organi iz člana 5. ovog pravilnika putem elektronske obrade podataka u okviru svoje nadležnosti vode, održavaju i koriste evidenciju o LK/OI za stranca.

IV - PRIJELAZNE I ZAVRŠNE ODREDBE

Član 15.

Ovaj pravilnik stupa na snagu danom objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

Član 16.

Stupanjem na snagu ovog pravilnika prestaje primjena odredbi čl. 48., 49., 50. i 71. i dio odredbi koje se odnose na lične karte čl. 67., 68., 69. i 70. Pravilnika o uslovima i načinu ulaska stranaca, izdavanja viza i drugih putnih isprava i izdavanju odobrenja za boravak stranaca u Bosni i Hercegovini ("Službeni glasnik BiH", broj 29/01).

Broj IV-141-001/03 19. juna 2003. godine Sarajevo

Ministar **Bariša Čolak**, s. r.